



## Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:  
30 грошей місячно,  
80 „ квартално,  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

Ціны оголошень:

Ціла сторона 120 зл., 1/2 сторони 60 зл., 1/4 сторони 35 зл., 1/8 стор. 20 зл., 1/16 стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долшом оголошеню значна знижка.

Конто чекове Нр. 404.155.

## Смерть Томы Масарыка.

Дня 13. т. м. помер на замку в Ляны бывший президент чехословацкой республики Тома Масарык. При одрі помершого президента до послідного момента находили ся всі члены родины, президент Бенеш с супругом и премьер Годжа.

В коротком часі до появилю ся вістей о смерти б. президента Масарыка, вывішено на домах Праги черны хоругви. В цілом краю оголошено народну жалобу. Тіло его забальсовано. Похорон отбыл ся 20. вересня.

Покойный прожил 87 літ. Жите его было тверде. Сам, без ничией помочи дошел до найвысших достоинств в державі. Сын бідных родичей, по одержаню скромного образования в німецкой школе в Авсипитц, был высланный до Відня на науку до коваля. Пак был терминатором в Цейц. Ту познал ся на нем оден учитель и забрал го до школы до Чейковиц. Яко 15-літний хлопец вступил до школы німецкой в Берні Моравском.

В р. 1869, маючи літ 19 и окончену гимназию выїхал до Відня на университет, котрый окончил в р. 1876 яко доктор философии. Науку поглублял дальше на университетах в Италии и в Америкі и в р. 1882 достал номинацию на незвычайного професора в Празі, а в 14 літ погодивше остал звычайным професором того университета.

Дятельность его ест початково наукова и литературна. Ест редактором газет: „Атенеум“ и „Час“, котрый счасом стае ся газетом партии реалистов. Ест то початок его политычной дятельности, бо реалистычна партия переходит скоро в партию Молодочехов, котра выберат Масарыка послом до австрийского парламента.

В р. 1900 основуе Масарык народну партию. В том часі пише много на ріжны темы исторычно-политычны.

В літах 1891, 1907 и 1911 ест выбраный послом до австрийского парламента. В р. 1913 выдае велике сочинене п. назвом: „Россия и Европа“.

По выбуху світовой войны зачинат ся оживлена политычна дятельность того гениального мужа. От початку войны ест он здекля-

рованным противником Австрии. Выїзджат до Амстердам для переговоров с англичами, пак в Италии скликае конференцию с представителями полудневых славян и так трудит ся непрерывно аж до часу розвала Австрии. Жие в часі войны в Парыжі.

Дня 14. листопада 1918 р. вертат до Праги, где выбирают его першим президентом республики Чехословацкой.

В р. 1920. выбирают его другой раз президентом, а в р. 1927. по раз третій помимо, же конституция чехословацка противит ся тройному выбору президента.

В р. 1928 захворил и уступил с президентуры. Президентом выбрано его политычного ученика и тогдашного министра заграничных справ — Бенеша.

От того часу жил пок. президент в замку в Ляны.

Тепер плаче за своим освободителем ціла Чехословакия.

## Комуникат

в справі сплачания перед термином рольных долгов.

Воеводске Бюро до Справ Финансово Рольных в Кракові звертат увагу селян, котрых грунт не перевышат 50 га. землі, на користи, выпльваючи с частичного, або цілковитого сплачания прыватных долгов рольных перед термином.

Кажда заплата готовыма грошами, котра мусит выносити не меньше як полрочну рату, буде амортизовати 200 процент заплаченной сумы. (На пр. если кто заплатит тепер на старый долг рольный 100 зл., то отчислят ся ему от долгу 200 зл., — прим. складача).

О близши информации и евентуальны обчислення высоты рештующих рат, бо передтерминна заплата мусит быти зачислена на цілость долгу, отже решта рат буде пропорционально обнижена, селяне-должники могут звертати ся до Бюр Делегатур Повітовых.

—000—

## Чи буде нова світова война?

Американский Институт Публичной Опиинии росписал анкету на тему евентуальностей будущей войны.

На поставлены в анкеті питання:

Чи буде нова світова война? — прислало отвіт 100 тысяч людей походячих с ріжных кругов и 73 процент тых людей отвітало „так“, а 27 процент — „ні“.

На друге питання: чи выбухне война в будущем року? 16 процент людей отвітало „так“, а решта — „ні“.

Третє питання было: якый народ, або якы народы хотят выкликати світову войну?

Отвіты были такы:

30% — Німеччина,

27% — Италия,

19% — Япония,

11% — Россия,

5% — Испания,

3% — Кытай,

3% — ріжны державы,

2% — Велика Британия.

Ани оден голос не пал на Польшу, ани на Францию.

На четверте питання: чи Америка приняла бы участь в той войні? 56% отвітало „так“, а 44% — „ні“.

Сут то отвіты цікавы, котры выказуют, же опасность войны ест велика. Цікавый ест также отвіт, относительно четвертого питання, бо знане ест, же Америка до тепер жалует, же приняла участь в послідной світовой войні. Она хотіла бы, штобы николи воен не было.

Але если тепер перешло половина населения заявила ся за новым вмщанем ся в світову войну, то хыбаль лем прото, же в виду развивающей ся авиации не даст ся стояти на стороні, а также и прото, же Америка не може допустити до розбитя Франции и Англии.

—000—

## Борба с пиянством.

В Варшаві радит міжнародный Конгрес противалькогольный.

Делегаты многих держав радят, як побідити зло, нищаче тіло и душу теперешного человека. Прото тыж очи цілого світа сут звернены тепер на Варшаву. Ждут результатов тых обрад всі идеовы единицы каждого народа, котры видят в пиянстві наибольшого врага человечества.

Много бід дало ся усунути через лучный труд народов. Так усунено невольництво и торговлю живым товаром. Тепер веде ся через всі народы борбу с торговльом наркотыками. Тота борба, поднята многыма народами, має вид на побіду.

Таку саму борбу треба выповісти алькоголеви и пиянству. Борба мусит быти переведена через всі народы и всі державы, бо лем втотчас можна с ней выйти побідоносно.

Якого оружия ужити в той войні — має рішити теперешный Конгрес противалькогольный.

В Америці поднято уж борбу с алькоголем, котра на жаль была програда. Але тото не повинно нас отстрашати, а наоборот, с тым большим силом человечество мусит обявити нову войну тому страшному врагову.

Як страшны последствія потягат за собом алькоголизм, доказуют ріжны обчисленія и статыстыкы, а также кроникы полицейны.

Нужда, хворота, всякы преступленія и смерть сут неотступныма товаришами пиянства. А килькож то трагедий розграват ся под впливом алькоголю? Килько супружых драматов, килько несчастъ, килько розсіяных по світі дітей родит ся в пиянстві?

Статыстыка приготована на Конгрес выказуе, же одним с головных причин опуцання

работы через работников ест алькоголь. Але не каждого дня число неприсутных на работі ест одынакове.

В понеделкы бракуе праві  $\frac{1}{3}$  часть работников, в суботы лем 9,3 процент, бо в неділю, в другой день по выплаті пот значно больше, як под конец тыждня, коли уж бракуе грошей.

Але ище страшнійше выглядят статыстыка пия спиртных напитков через діти.

На 100 дітей перешло 86-еро знае смак алькоголю, 2,4 процент дітей не горілку, а 56,7 процент достае алькоголь от родичей.

Діти пот от вчасной молодости. От 1—2 літ не 2 процент дітей, от 2—4 літ — 3,5 проц., от 4—6 літ — 46,3 проц., а от 6—8 літ — 47,9 процент.

Так представляют ся числа в Польці, котра належит до держав, консумуючих барз мало алькоголю.

Помимо того населене Польци пропиват рочно 1 миллиард 444 милионы злотых, а в одной годині 164.830 злотых.

Ест то так великий капитал, же за него можна бы было побудовати фабрыкы, в котрых нашло бы роботу 140.000 работников.

Ииша статыстыка выказуе, же причином перешло  $\frac{1}{3}$  части злых нот у учеников ест алькоголь, бо оказуе ся, же алькоголь пот не лем діти безпризорны, але также діти, жиючи при родичах.

В загалі статыстыка выказуе шкоды, яку выряджат нам алькоголь, ест страшна. Прото тыж в Конгресі противалькогольном причали участь найвысши достойники церковны и державны.

—ооо—

## Война на Далекоем Выході.

Бои под Шанхаем идут с переменным счастьем. Кытайскы войска держат ся несподівано сильно. От часу програной войны в р. 1932. армия кытайска поробила величезны поступи под взглядом вышколения, вооруженія и одностороннего начальства.

Над ріком Янтсе кытайскы войска отперли всі атаки и посунули ся наперед. От результату боев о Шанхай буде залежати судьба выправки японской в полночном Кытаю. В последном часі Япония переносит также военну акцию до полудневого Кытаю. Японскы войска бомбардуют Кантон, будучий головным администраційным и войсковым осередком цілого полудневого Кытаю. Але и ту войска кы-

тайскы приготавлиют ся до отпора.

С ииших справ, относячих ся до Далекоего Выходу слідуе замітити лем одну, а именно, же Япония не понагляет ся с отвітом на английскый протест в справі покалічення английского представителя в Кытаю. Видно, же она не перенимат ся занадто том справом.

Того рода поступане може ище больше заострити отношения японско-англицкы.

В каждом разі с того всего видно, же без взгляду, як закончит ся война, одно уж тепер ест певне, же впливы білой расы в Азии сут поважно захвіяны и же там угрунтоуе ся чимраз сильнійше клич: „Азия для азиатов“.

## Великы німецкы маневры на Поморі.

На другу половину вересня сут заповіжены великы маневры німецкых войск, які мають ся отбыти на Поморі, в Мекленбургіи и на Балтийском морі.

Маневры тоты мають перевысшити розмірами всі войсковы вправы от часу войны. На маневры має прихати Муссолини. Ціль тых маневров ест показати світу в часі рішаючих ся справ середземноморских и Далекоего Выходу, яку милитарну силу має Німеччина и як

громадне политычне значене має союз німецко-италиянскый.

Союз тот ест заключеный на совсем ииших основах, як союзы в часах передвоенных. Втотчас лучили ся, або воевали с собом державы о цілковито ииших устроях политычных. Лучили ся лем против их врагов, а поза тым нич их не лучило. Тепер союз Німеччины и Италии операт ся передовсем на фашизмі, котрый обявил завзяту войну комунизмови.

Во имя тых основ ліе ся тепер кров в Испании, тоты основы звязали тісно Италию и Німеччину.

Выбор Поморя, яко місце маневров, при одночасном приїзді Муссолини до Німеччины має свою велику вымову и для Польци. Німецкый „Дранг нах Остен“ (перте ку виходу) находит ту под взглядом политычным и войсковым свой добитный выраз.

## ЯПОНИЯ отрізуе Монголию от Кытая.

На Далекоем Выході кромі военной акции розвивают ся одночасно политычны события о великом значеню.

В Монголии внутренней и в полночном Кытаю японцы укріпляют ся на добре. Войска японскы на полноч от Пекина, а также войска, котры опановали провал Нанкоу и Калган, получили ся с собом и идут вперед вздолж желізничной линии.

Такым способом в коротком часі могут они отрізати Монголию от Кытая и перервати звязь меже Монголиом советском и кытайском арміом.

Опановане внутренней Монголии при одночасном владію над кытайско-полночными провинциями позволит Японии перевести широкы пляны, угрожаючи так Советам, як и Кытаєви.

Япония хоче утворити независиму державу полночно-кытайску со столицом в Пекинї под назвом Куа-Пеи-Куо (велика Монголия), складаючи ся с чотырох провинцій. Во главі той державы має стати монгольскый князь Тек-Ванг, потомок Джингис-Хана.

Аж тепер видит ся, як далеко Япония опановала политычно и войсково Кытай. Утворене двох новых азийских держав, на половину независимых, под протекторатом Японии нищит в самом корені сотрудничество кытайско-советске, ослабляет Кытай и задае удар в само сердце Советам.

Збудженный национальный дух в независимой внутренней Монголии буде проникати в глубину советских посілостей в Азии, замешкалых через монгольске населене, а тым самым получит ся с Манджуріом. Тоты дві державы будут передовыма стражами Японии против Советов.

Тоты события спричиниди, же Кытай заключил дня 21. серпня т. р. с Советами союз, направленный против Японии. Але на разі помоч Советов ограничат ся до того, же Советы дают Кытаєви амуницию, самолеты и военный материал.

В Кытаю середном и в Шанхаю Япония має ииши пляны. Ту расходит ся ей головно о интересы политычно-господарчи. Ту войну веде ся о оден с найвекших рынков продажи и о наибольший запас суровых материялов. Ту однак сут заинтересованы не лем Япония и Кытай, але также Америка, Англия и много ииших держав.

**В Редакциі „Лемка“ в Крывиці можна достати ріжны книжочки религийного содержания.**

## Што робити с падаючими овочами.

В каждом саді падає на землю маса садовини. Если приглянеме ся падаючим овочам, то спостережеме, же сут они двоякого рода одны с них сут подыравленны, а в середині сидит хробак, а други маю на своей поверхні темноту пятна, вгрызаючи ся в середину овочей, по чом можна познати, же они гниют.

Звычайно часть падаючої, хробачной садовини и то красшой, селянин зберат и уживат во власном господарстві, або в кухні. Часом кормит нима свині, а часом продає, если трафит ся купец.

Часто однак трафят ся, особливо в садах великих, же на землі под деревами лежат маса опавших овочей и никто ся нима не занимає. То єст велика хыба, котра мстит ся на овочах в слідуемых літах, бо гниючи на землі овочы сут розсадниками шкодников и хворот.

Каждый дбачий селянин повинен всі опавшиє с дерев овочы старанно зберати и усувати. Относит ся тото до всіх гатунков садовини, отже до яблук, грушок, сливок, черешень, оріхов и т. д.

Падалкы хробачливы сут найчастіше хованком для хробака, котрый погодивше выходит с садовини, влазит до землі и пак переображат ся и по якомси часі выходит со землі дорослый моль овочевый, хрущик, або инший шкодник, котрый складат яичка на овочах, а

бо на завязках. С тых яичок вылазит гусеничка, котра вгрызат ся в овочы и нищит их.

Штобы до того не допустити, дбачий садовод повинен каждого дня рано старанно вызберати всі хробачны падалкы, штобы разом с нима усунути шкодники. Повинно ся также каждого рана перейти по саді и легко потрясти дерева. Попадають втотчас хробачны овочы, а с нима и хробакы, котры ище не вылізли с садовини и не скрыли ся в землі.

Падалкы згнилы треба также старанно с саду усувати. Переважно не надають ся они до їдла, для людей, але по вырізаню згнилой части мож их скормит свинями. Згнилы части треба старанно спрятати и закопати в землю, або вымішаны с паленым, або свіжо згашеным вапном вышмарити на компост.

Поступаючи так каждого року и управляючи в осени грунт меже деревами и вокруг дерев, селянин може позбыти ся праві цілковито многих шкодников и хворот, напастуючих наши сады.

Помочны в той борбі будут и други стараня, як опрыскане овочевых дерев течами, убиваючими овады и грибки, закладане на дерева повересел и т. д.

Вся тота работа оплачат ся, бо через ню можеме дойти до красной и здоровой садовини, котра може увеличит доходы с наших господарств сельских.

## Кто має право накладати шарварк.

У нас чує ся часто, же люде наричут на шарваркы и неохотно их отробяют. Многы сут и такі, котры твердят, же ніт права накладати шарварк и же шарварку не мусит ся отробити.

Тым мусиме сказати, же на основі закона с дня 26. марта 1935 р. (Дн. З. Р. П. Нр. 27, поз. 204) право накладати шарваркы має:

- 1) рада гминна,
- 2) рада повітова,
- 3) власть переводяча комасацию грунту.

Обовязок отробяня шарварку обнимат цілу державу, кромі воєводства шлеского. Обовязком тым можна обтяжити населенє гмин лем в цілях будовы и удержаня дорог самоуправных, переведеня водных мелиораций, бу-

довы будынков гминных и громадских, а также в ціли залісеня гминных и громадских неужитков.

Шарварк маю отробити тоты жителі села, котры платят податок грунтовой, от нерухомости, промысловый, або выровнительный.

Шарварк вызначат ся в роботизні пішой, але властители средств перевозовых могут быти в цілости або частично обтяжены роботизном запрягом.

Вмісто роботизны може каждый до того собовязанный внести до касы равновартость той роботизны в грошах.

Найдальше отдалене работ не може перекрачати для роботизны пішой 3 км., а для запряженой 8 км.

непересохлого не выкыршили ся наймолодши листочки и не стерли, што має місце все при перевертаню сіна. Таке сіно єст о 25% поживнійше от сіна с травы пересохлой.

В практыці выглядат то так, же 125 кг. сіна пересохлого вартат тилько, як 100 кг. сіна с травы непересохлой. Понеже соль на тых 100 кг. сіна коштує 11 гр. — рахунок єст простый. Преця не купит за 11 грошей 25 кг. сіна.

**Масы гусениц задержали поїзд.** В полудневой Австрии выростає в літі величезна маса мотылей. Тепер с миллионов яичок, зложеных через мотылі вылягли ся невіроятны количества гусениц, котры нищат на великих пространствах поля и загороды.

Кромі того на пару линиях желізничих обсілі гусеницы желізничы шины, на котрых задержуют ся поїзды.

## Комунікат

в справі ціны чаю.

Староство в Новом Санчі, навязуючи до своего зарядженя с дня 10. мая т. р. Ч. Г. П. 3/13/37., повідомляє, же усталена от дня 1. мая т. р. ціна 16 зл. за 1 кг. чаю в в дробной продажи, относит ся до найдешевших гатунков чаю т. є. Суматры, Цейльона и мішанок отвічаючих свойствами тым гатункам. Чай тот має быти продаваный под назвом: „мішанкы популярной”.

Выши и дорозши гатункы чаю Цейльон и Суматра, если их назвы сут дополнены спеціальными написами, выказуючими возвышенность тых гатунков (нпр. „гатунок вышій” — „прима”) и т. д. могут быти продаваны по цінах вышших як 16 зл. за 1 кг.

## Чи не можна иначе?

Каждого дня привозят до Крыницы желізничом телята и каждого дня выїздят по них на стацию маленька фурка, до котрой нормально може помістити ся одно, а найвече двое телят.

Тымчасом до той фуркы бере ся тилько телят, килько приїхало и робит ся тото в звірський способ. Телята вышмарят ся с вагона на фурку, як дрова и там гнете ся их и допче так, штобы ся помістили. Страшный рев телят роздерат воздух, але тото ани на момент не змягчат сёрдц немиросердных погоничей. Собрана часто на стации дівтора приглядат ся тым операциям.

Тото страшне мучене невинных звірят повинно быти як найскорше усунене. Хоц телята Perezначены на заріз, то однак никто не має права мучити их прото, же двократный выїзд по телята на стацию коштувал бы ище пару грошей. Тых пару грошей могут крыницкы різники легко заплатити, бо маю с чого, если возме ся под увагу ціну телят и телятины, котрой 1 кг. платит ся по 1,30 гр.

**Руда желізна коло Коросна.** В многих місцевостях коло Коросна открыто желізну руду о высоком проценті желіза.

Открыто там также и приступлено до експлоатации т. зв. руды дерньовой, выступающей переважно на мокрых луках. Эксплоатация отбыват ся переважно таким способом, же знимат ся верхню верству луку, не нищачи дерні и спод ней выберат ся верству руды дерньовой, котра єст около 15 см груба. Пак укладат ся назад дерні на уровні о 15 см низшом.

Руду дерньову открыто также в повіті мелецком. Руда тота має от 30—40 процент желіза.

**Перуны забили в Болгарии 19 тысяч овец.** Болгарске миеистерство рольництва подало до відома, же в перших шестох місяцах т. р. перуны забили 19 тысяч овец. В том мал місце оден небывалый случай, же от одного перуна згынуло в липні т. р. аж 865 овец.

**Страшна желізнича катастрофа в Німеччині.** Под Неус в Німеччині выбил ся с шин скорый поїзд и упал с высококого насыпу. Результаты катастрофы сут страшны. Пару возов єст цілковито розбитых, а решта сильно потріскана. В катастрофі стратило жыє 16-еро люда, а 12 єст тязко раненых.

## Перед кошенем отав.

Планны тогорочны травы стали ся причином, же в том році мусиме больше дбати о отаву.

Зрозуміла річ, же не можеме тепер вплинути на тото, штобы отава выросла велика, як также и на тото, штобы на час кошеня отавы была красна погода, але от нас залежит, штобы отаву собрати в порядку и не дати ей запліснїти.

Штобы не змарновала ся нам отава, треба уж завчасу заосмотрїти ся в соль и цілу скошену отаву посолити. Робиме тото так, же пересхнену кус отаву складаме до коп и верствами солиме, а зверху прикрываме копы сухом соломом. Так уложено и посолену отаву можна уж по двох днях звозити без обавы, же запліснїє, або згниє. Можна ю оставити также в поли, бо не шкодит ей дождж.

Притом маме ище и тот хосен, же с сіна

## ШТО ЧУТИ В СВІТІ І В КРАЮ

**Місто посуват ся до ріки.** Місто Сымбирек в Росии, положене над ріком Волгом посуват ся чимраз ближе ку ріці, што може грозити катастрофом. Причином того являт ся знищенє охоронних поясів лісових.

**Што може зробити охота.** Же „громада — то великий человек“ перекопуеме ся на селі Князьсело, належаче до гмины березинской на Вольни. Солтыс того села заохотил людей до будовы дороги через село и в одном році повстала добра дорога с ровами и ходниками по боках.

**На Полісю посуха.** На Полісю панує от на-ру місяців спека. От спеки обнижил ся уровень воды в ріках до той степени, же задержал цілковито водну комуникацію. Корытами гдеяких рік іздыт без перешкоды фуры. Такой посухы не памятают найстарши люде на Полісю.

**Спало ся ціле село.** В Рожках в пов. минско-мазовецком повстал пожар, котрый в коротком часі обнял ціле село. Люде ледво потрафили ся выратувати, а о выратуваню до-бытка и мовы не было. Село ктоси подпалил.

**Гриб-великан.** В повіті ярославском най-дено в лісі гриб-біляк, котрый важил перешло 3 кг. Был он совсем здоровый и держал ся через тыждень, в котром оглядала его толпа ці-кавых.

**Тот мал апетыт.** Місто Сидней в Австра-лии слідило с незвычайном увагом цікавый застав. Двох тамтешних жарлоков вставило ся, кто с них с'їст веце яиц. Рекорд побил Грагам, котрый в продолженю години с'їл 128 яиц звареных на мягко. В нагороду за тото достал он 3.000 зл. и много подарунков.

**Як хоронити звірята перед мухами.** Пала-та рольна в Дании росослала до всіх селян по-відомленє, в котром поручат цікавый способ для охорони домашних звірят перед мухами. Радит она селянам, штобы поуставляли в стай-нях лампы о червеных шклах. Могут то быти звычайны літарні, в котрых шибы будут по-мальованы на червено. Червене світло отума-нят и усыплят мухы и они перестают докуча-ти статку. Пороблены досвіды мали дати до-бры результаты.

**Гады — великим присмаком.** Война на Далеком Выході заинтересовала світ, котрый слідит также за звычайями японскыма и кы-тайскыма.

Недавно одна англицка газета донесла, же найбільшим присмаком для японского насе-леня сут всякого рода гады. Особенно пропада-ют они за печеныма гадами.

В реставрациях в Токио иде каждого дня што найменше 1.000 гадов.

„Великий магазын ужей“ Асакуса в То-кио продає рочно понад 100 тысяч гадов.

В послідных літах дає ся отчути в Японии брак гадов и бесідує ся о их штучной годовлі.

**Гребені и чеколяда с кырви.** Недалеко Мо-нахиум в Німеччині єст фабрыка, котра робит найрозмайтши предмети с кырви. Кров с за-битых звірят препарує ся отвітно, штобы у-сунути с ней субстанции, поводуючи стинанє ся кырва. Пак кров сушит ся и меле на муку, с котрой при отвітном тисненю одержує ся

тверду масу, служащу до выробу гузиков, гре-беней, ручок до парасолей и т. д. Предметы то-ты тшат ся сильным покупом.

В фабрыці той додают также свіжу кров до выробу спеціальной чеколяды, котра має великий покуп в Японии.

**Чорна ружа.** С Калифорнии доносят, же в місті Санта Барбара удало ся одному огород-никови выплекати новый гатунок ружы, а и-менно полну, пахучу ружу чорну о красном, аксамитном блеску. Крім того выплекат тот огородник высокопенны ружы на 3—4 метров, а одну на 6,5 метра високу.

**Два выбухы в Парыжі.** В суботу дня 11. т. м. о год. 22. мали місце одночасно 2 експльо-зии: одна в будынку союза французских про-мышленников, друга в централі союза мета-лургичного.

Величезной силы взрыв знишил цілкови-то 5-поверхный дом кондерации промышлен-ников. Друга бомба знищила частично муры и цілу середину дому належачого до союза ме-талургичного промысла.

Под розвалинами дому легло двох поли-циантов, полнячих службу при tych домах. Сторож дому от взрыва стратил бесіду.

Доходженя ствердили, же обі пекольны машины мали механизм годинный наставле-ный на тоту саму годину.

Подозрывают, же пекольны машины под-ложили агенты чужих держав.

Аж по выбуху выявило ся, же полиция уж передом нашла в послідных днях 14 пе-кольных машин, подложных под ріжны бу-дынки. Не хотіла однак выкликати паникы и прото нич о том не писано.

**Затопил ся самолет, котрый глядал Лезо-невского.** Газеты подають, же самолет, пильото-ванный Василиєм Задковым, котрый был вы-сланный для отнайденя Левоневского, упал над океаном Арктычным до моря и затонул.

**Кырвавый меч во Львові.** В часі биткы, я-ка повстала меже публиком по мечу Лехия — Украина в неділю, дня 12 т. м. во Львові, до-пущено ся замаху на полицианта.

В часі, коли полиция в цілях интервен-ции вошла меже буючих ся, оден украинец у-дарил постерункового тупым знарядом в голо-ву. Раненого постерункового отвезено до шпи-таль. Напаствника арестовано.

**Тайфун в Японии.** Тайфун, котрый наве-стил западне побереже Японии, вырядил вели-чезны шкоды. Пропорцияльно найменше по-терпіло Токио, але за тото в Осака вода заля-ла перешло 600 домов.

В Кубе єст велике обезпокоєнє по поводу кораблей, котры находят ся на морях.

Агенция Домен доносит, же тайфун спри-чинил смерть 15-єро людей, 46 хат єст знище-ных, а около 1.000 заляных водом. 200 кораб-лей рыбацкых затонуло.

**Буря на Балтийском морі.** Дня 12 т. м. повстала на Балтийском морі величезна буря, котра мало што не затопила польскый яхт „Адмирал“, котрый плынул с Гдыні до Шток-гольма. Яхт тот, на котром было 6 людей, в том числі 2 женщины, был ушкодженый, парусы сорваны, а морякы змерзвєны и перемочєны.

С трудом яхт достал ся до порту Вент-пшильє, где с першом помочом поспішили им морякы Латвии.

**Новы запальники.** В коротком часі мають ся появити на рынку новы запальники, уж остемплеваны, выпущєны через Польскый Мо-нополь Сірничаныи. Ціна запальника має вы-носити 4 злоты.

Доносимє, же в перших днях жолтня по-явит ся наш богато иллюстрованный

### КАЛЕНДАР НА Р. 1938.

и просимє уж тепер присылати замовлєннє. Редакция принимат также всякы материялы и фотографии, относячи ся до культурного и экономичного житя наших сєл. Материялы то-ты будут поміщєны в календарі. С пересыл-ком материялов треба ся спішити.

ПОМІЩАЙТЕ  
ОГОЛОШЕННЯ  
В ГАЗЕТІ „ЛЕМКО“.

Куплю иллюстрованє Житє Святых, состав-ленє о. Ант. Добрянским и велику библию, составлену о. Мацаком.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ІНЮ

НЕХАЙ ЯКНАЙСКОРШЕ

за асекурує ся  
в асекураційном Товаристві  
**ВИТА И КРАКОВСКЕ**  
во **ЛЬВОВІ**

Асекурацію принимают на цілой Лемковщині  
представителі: гг. Осиф Яновицкий — Крыница - Сєло  
и Михаил Перелом — Сянок.